

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tūpa rembiporavo pe recua pīpe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tūpa rembiporavo yipisuive peico semimbotar rupi. Evocoyase oEspíritu Santo pīpe pe peha oyeupe nara viroyasar pe reco āgua ‘imoatiroprī toyuvirecoi che Rahir ruvi pīpe oangaipagüer sui’ oya. Peipisi catu Tūpa porovasasa pe reco tupri āgua.

Tūpa suindar mbahe aviye vahe rãrosa

³ ¡Imboeteipri tasecoi Tūpa, yande Yar Jesucristo Ru! Ahe niha oporoparaisuerecosa pīpe yande recocuer mbopiasu. Ëgüe ehi yandeu Guahir Jesucristo ocuerayevise. Ipīpe sui yaicuaño ité oimera mbahe aviye vahe Tūpa suindar yandeu. ⁴ Ipīpe sui avei Tūpa oipisi ucara pëu pe mombaheisa ivave yapocatupri nocañi vahe rã, ndituyui vahe rã iyavei ndopai vahe rã ité. ⁵ Pe peyeroya ité Tūpa rese. Sese niha ahe opĩratasa pīpe pe repi mbahe tēi sui poropĩsirosa pe reco āgua. Ahe viresco vahe imoingatupri ari ipa vahe mboyecua āgua pëu.

⁶ Co rese peyemboviharereño peico, yepe cūrítei pe reco pipe peparaisu pucu raimi tēi setá pe recoãhasa pipe peico viña. ⁷ Esepia, pe yeroyasa Tūpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pĩha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevisé curi.

⁸ Pe niha pesaisu yande Yar Jesucristo, yepe ndapesepiai viña; cūrítei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. ⁹ Esepia niha, pesupiti pe remiaro poropĩsirosa apirēhi vahe peico pe yeroyasa pipe.

¹⁰ Aracahe suive ava Tūpa ñehe mombehusar oicua tupri pota ité co poropĩsirosa resendar yuvireco ‘¿mara ehi eté pĩha co tecocuer?’ oyapave yuvireco. Iyavei oñemoñeta yuvireco Tūpa oporoaisusa pipe pēu mbahe ombou vaherã rese.

¹¹ Cristo Espiritu senondeve oicua uca mbahe Tūpa ñehe mombehusar upe aipo ehi: “Poropĩsirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pĩha evocoi mbia?” ehi; “¿Mbahesera vo oimera co Espiritu remimombehu yandeu?” ehi yuvireco. ¹² Tūpa rumo omboyecua chupe, ndahei chupe nara ité imombehupri yuvireco, pēu nara ité rumo. Ahe avei niha poropĩsirosa

resendar ñehesa mombehusar omombehu pëu cūrítei, Espíritu Santo pĩratasa pĩpe imbouprĩ iva pendar yandeu. ¡Tũpa rembiguai avei oicua tuprĩ pota tēi cūrítei yuvireco viña!

Tũpa yande poravo yande reco maranehi ãgua

¹³ Sese pe pĩhañemoñeta tuprisa pĩpe pemahe-moha tuprĩra peyese Tũpa porovasasa pëu ombou vaheřã rese pe yeroya catu ãgua acoi Jesucristo oyeveise curi. ¹⁴ Tahĩr iporeroya vahe pe recosa pĩpe ndapeicoi chira mbahe pe remimb-otaraĩ pĩpe, acoi pereco vahecuer peyese Tũpa recocuer cuaēhi vĩteseve. ¹⁵ Peicora rumo pe reco maranehisa pĩpe ité. Esepia, Tũpa pe poravo oyeupe nara; ahe ndaseco maraĩ vahe ité. ¹⁶ Supi eté icuachiapri aracahendar pĩpe aipo ehi imombehu: “Pe tapeico seco maranehi vahe. Esepia, che ndaseco maraĩ vahe aico” ehi.

¹⁷ Tũpa niha opacatu ava upe secocuer rese nomboyovĩratĩ chira oporandu curi, sese pe, “Che Ru” peye vahe chupe peyembosĩquĩyera mbahe tēi apoēhi ãgua imboeteisave co ivi pĩpe peico vĩtese. ¹⁸ Esepia, Tũpa pe pĩsĩro aracahendar pe ramoĩ suindar aracuasa ěgũe ehi tēi vahe sui. Peicua tuprĩ ité niha co poropĩsĩrosa repri nimboepĩsai eté que mbahe ocañi tēi vaheřã pĩpe inungar oro, anise guarepochira viña. ¹⁹ Imboepisa rumo Cristo ruvi maranehi pĩpe. Ahe seropovēhepri, inungar ovesa nĩmarai vahe. ²⁰ Ahe Tũpa oiporavo aracahe ivi, iva apoēhi vĩteseve ěgũe ehi vaheřã. Cūrítei rumo oyem-boyecua pëu mbahe tuprĩ ãgua. ²¹ Secocuer sui niha peroya Tũpa peico, ahe ombogũerayevi

vahe omano vahe pãhu sui, ipare omondo oyemboeteisa, güeco porañetesa avei chupe. Ipípe sui peyeroya Tũpa rese iyavei pesãro co mbahe aviye vahe písi ãgua ichui.

²² Cũritei Tũpa Ñehengagüer supi tupri vahe mboyeroyasa pípe imoatiroso pe recocuer pesaisu vaheã ambuae Jesús reroyasareta. Evocoyase ãgüe peyera peyeaisu catu opacatu pe píhañemoñeta tuprisa pípe, iyavei opacatu pe píratasa pípe. ²³ Pe niha pereco tecovesa píasu, ndahei pe yesupa omano tẽi vahe suindar. Ahe rumo Tũpa Ñehengagüer supi tupri apirẽhi vahe reroya pípe. ²⁴ Esepia, icuachiapri aracahendar pípe aipo ehi:

“Opacatu ava inungar caha, iyemboeteisa evocoyase inungar ipotri.

Ipare ahe caha opa omano, ipotri avei opa oviapi; ²⁵ Tũpa Ñehengagüer rumo apirẽhi vaheã ité yepi” ehi.

Ahe co ñehesa imombehupri poropĩsirosa resendar pẽu nara.

2

¹ Sese peseya opacatu mbahe naporai vahe; opacatu porombopasa tẽi, pe reco tupri angahu tẽisa, ambuae ava mbahe pota raisa, iyavei opacatu mahechiroi resendar. ² Inungar pĩtanimi ocuacua ãgua oipota cambi; ãgüe peye aveira pe querẽhisa pípe Tũpa Ñehengagüer rese pe yembohe catu iri ãgua, peico tupri ãgua poropĩsirosa pípe, ³ que peicua itese yande Yar reco aviyesa.

Cristo inungar ita ndopai vahe

4 Peyemboya catu yande Yar rese. Ahe inungar ita ndopai vahe. Ava rumo oviroĩroño yuvireco. Tũpa rumo ahe ita oiporavo aviye catu vahe. 5 Ēgüe ehira pe rereco oyeupe inungar ita ndopai vahe; ipipe sui omopuhara otũparoguã pe rese. Iyavei pahi ndaseco marai vahe nungar peicora semimbotar rupi chupe. Pe evocoiyase Jesucristo rembiapo pipe sui peyapora Espiritu upendar mbahe aviye vahe. Ahe inungar mbahe seropovēhepri aviye vahe Tũpa upe. 6 Esepia, icuachiapri aracahendar pipe aipo ehi:

“Che amondo ñepi ita nungar ava aviye vahe tecua Sión ve imoviracua ãgua.

Ahe che rembiporavo iporañete vahe, imboeteipri.

Acoi oyeroyá vahe sese, ahe nochĩ chietera ichui” ehi.

7 Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oĩ aposar rumo viroĩroño co ita yuvireco.

Ahe ita rumo coiye vīracuasa aviye catu vahe” ehi. 8 Iyavei omboaviye aipo ñehesa:

“Co ita oipihapi oiti uca ava” ehi. Esepia, Tũpa suindar ñehesa reroyaēhi pipe sui oyemondo uca mbahe tēi pipe yuvireco. Ēgüe ehi vaherã ité rumo ahe secocuer yuvireco.

9 Pe rumo ava oyesuindar nungar iporavopri peico Tũpa uve nara, imborerecuasa upendar pahi, iyavei chupendar ava seco maranehi vahe peico. Ēgüe peye Tũpa reco pĩratasa mombehu ãgua peico. Esepia, ahe pe renose pĩtumimbisa

nungar pe recocuerai sui tesapesa aviye vahe pipe pe reique água. ¹⁰ Yipindar ndahe vitei eté Tūpa upendar ava peico, cūrítei rumo ahe ité peico; yipindar ndaperecoi Tūpa poroparaisuerecosa, cūrítei rumo pereco ité cute.

Peico catu Tūpa mboetei água

¹¹ Che rivieta, che rembiaisu, peico raimi tēi vahe co ivi pipe, pepoi opacatu co ivi pipendar pe pihañemoñeta raisa sui. Esepia, pemomara uca tēi pe recocuer ipipe. ¹² Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroïro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecur co ivi pipe: que mborerecur guasu ivate catu vahe, ¹⁴ anise yivirindar. Ahe pe recua pipendar rārosar imondopri ava naporai vahe mombaraisu água, iyavei ava seco catupri vahe upe, “Aviye nde recocuer” he água. ¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi água.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe rivieta Jesús reroyasar; pemboetei Tūpa; pemboyeroya avei mborerecur guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pîpe que seco catuprî vahe, que ndaseco pōrai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroya tuprîsa pîpe. ²⁰ Mbahe tēi aposa pîpe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tuprî aposa pîpe pe mombaraisuse yuvireco, ipare peñemosase chupe, ahe rumo aviye catu itera Tūpa upe. ²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevîi eté iñehe raisa. Iyavei acoi omombaraisuse yuvireco, “Ayepîra sese” ndehi eté. Ahe rumo, “Che Ru Tūpa seco ñvi vahe oicudara chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pîpe curusu rese ‘toyepepî angaipa sui yuvireco. Ipîpe sui toyuvirecoi teco ñvisave’ oyapave yandeu. Ahe niha yapichapri secoi pe recocuer moingatü āgua. ²⁵ Esepia, pe niha yîpîndar inungar ovesa ocañi tēi vahe peico viña. Cūritei rumo peyevî Cristo upe. Ahe pe recocuer osãro cūritei inungar ovesa rãrosar.

¿Mara ehira ava omenda vahe recocuer yuvireco?

1-2 Ëgüe peye aveira cuña, pemboyeroya itera pe mer. Esepia, amove ndoviroya vitei Tüpa Ñhengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehei chira chupe viña. ³ Acoi pemboyecua potase pe yemoporañetesa ndahei chira pe rete rese inungar oãca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiëhisa pipe. Evocoi nungar aviye catu ité Tüpa rovaque. ⁵ Ëgüe ehi avei cuña seco catupri vahe güeco porañetesa imboyecua aracahe. Ahe oyeroya Tüpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeëhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tüpa omboura güeco tuprisa pipe tecovesa apirëhi vahe oyoya voi pëu. Ëgüe peyese, Tüpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepeï oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe.

⁹ Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tupriisa pipe pemboyevira chupe. Evocoi nungar mbahe apo ãgua niha Tūpa pe poravo ‘toipisi che porovasasa’ oyapave. ¹⁰ Esepia,

“Peipotase pe recocuer aviye tupri ãgua pe yemboviaharetisa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tupriisa peyeupe nara, peguata supi.

¹² Esepia, supi eté, yande Yar osãro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisi eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo. ¹⁴ Peparaisuse rumo mbahe pe rembiapo aviye vahesa rese, jsovasapri peico! Peyembosiquiyei rene que ava sui.

¹⁵ Pemboeteiñora rumo Cristo pe Yar secosa rese pe piha pipe. Peyemoingatu voira ava pe remiaro rese oporanduse pēu pe querēhisa pipe imombehu

tupri ãgua. ¹⁶ Ēgüe peyera rumo pe reco mbegüesa pipe imboeteisave. Peico tupriisa pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rãgüer sui. ¹⁸ Esepia niha, Cristo teieté omano yande angaipa repirã ñepi reseve. Güeco maranehi pipe Ēgüe ehi ava recocuerai rese

opacatu pe reraso ãgua Vu Tũpa upe. Ahe omano güete rese. Ipare rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tũpa remimbotar ava hã soquendapri yuvirecoi vahe upe. ²⁰ Ahe ava Noé recosendar ndiporeroyai vahe yuvireco aracahe. Tũpa osãro güeco mbegüesa pipe secocuer moingatu ãgua viña Noé oyapo vitesese arca oico. Ahe ipipe oñepisiro ochomi tẽi yuvireco amarusu sui. ²¹ Ahe i osãhangapo i poroãpiramosa, ahe omboyecua yande ipisiroproi yande recosa. Poroãpiramosa rumo i pipe ndahei yande rete moatiro ãgua. Co rumo yaporandura Tũpa upe, yande pihañemoñetasa moatiro ãgua. Ipipe sui evocoyase yañepisirora yande Yar Jesucristo cuerayevisa pipe. ²² Ahe oso ivave oguapi oĩ Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

4

Yandehañeco yandeyese mbahecuasa Tũpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoyase peyemoingatu voi ãgüe peye vaherã peico chupe nara. Esepia, acoi ava oyemomborara vahe güete pipe oseya angaipa yuvireco. ² Ipipe sui ndoyuvireco iri chira arirupi ava tẽi pihañemoñetasa pipe. Tũpa remimbotar rupi eté rumo oyapo pota mbahe co ivi pipe yuvirecoi vitesese. ³ ãgüe peye pucu rane niha pe rembiapo ai pipe peico ava Tũpa reroyasarẽhi recocuer nungar rupi tupri. Ahese mbahe-mbahe

tēi peyapo pe pihañemoñeta raisa pipe, savaiposa, pietasave pe rãse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. ⁴ Cūritei rumo pe mboriparer, ndoyembovīhai tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi. ⁶ Sese niha co ñehesa pĩsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespĩritu rumo yuvirecoi apirēhi inungar Tūpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe. ⁸ Co catu opacatu tupri ité peyeaisura pe piha pipe. Esepia, ēgüe yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuviraso vahe pe rētave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepeipei yande yaiporura Tūpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tupri co Tūpa porovasasa setá vahe yande cuaita mboaviye tupri āgua. ¹¹ Acoi pemombehuse Tūpa suindar mbahe, pemombehura inungar iñehe ité; acoi peporopĩtivi potase, peyapoño opĩratasa pēu Tūpa ombou vahe pipe. Opacatu mbahe peyapo vahe peyapo ‘tomboetei ava yuvireco Tūpa yande Yar Jesucristo rembiapo pipe sui’

pe hesa p̄ipe. Esepia, chupendar ité imboeteisa iyavei imborerecuasa. Ēgüe tehi apirēhi vaheṛā ité.

Yemombaraisusa Cristo reroyasar yande recosa p̄ipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoñhasa p̄eu ‘ndoyavi, ndipoi chietera evocoi nungar mbahe cheu viña’ pe hesa p̄ipe. ¹³ Yayembovihareteñora rumo ip̄ipe. Esepia, yande rereco yande Yar yemombaraisu agüer nungar p̄ipe yuvireco. Evocoiyase yayemboviharete itera acoi yande Yar oyevisē güeco p̄iratasa p̄ipe. ¹⁴ Iñehe marase yuvireco p̄eu Cristo reroyasar pe recosa rese, sovasapri peico. Esepia, Tūpa Espiritu güeco porañetesa p̄ipe secoi eté pe rese. ¹⁵ Acoi pe p̄ahu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposa rese. Ndahei chiaveira que ambuae ava mbahe rese iñemañeco tēisa sui Ēgüe ehira serecosa. ¹⁶ Co rumo acoi peparaisuse Cristo reroyasar pe recosa p̄ipe, ndapechĩ chietera. Pesapucaira rumo Tūpa upe imboeteisa p̄ipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu āgua. Ēgüe ehise yandeu, mbahe tēi catu itera Jesús reroyasarēhi upe. ¹⁸ Yavaise seco catupri vahe upe iñepisiro āgua, ¿mara ehira p̄iha ava ndaseco p̄orai vahe ava angaipa viyar yuvirecoi vahe upe? ¹⁹ Sese

peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rãro ãgua. Esepia, ahe niha yeroyasa ité secoi.

5

Aracuasa Jesús reroyasar upe

¹ Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ãgüe ahe aveira acoi yande Yar oyevisse curi. ² Pesãro tupri catu Tūpa upendar ava eta pe remiaro co omondo vahe pẽu inungar ovesa rese yangarecuar osãro tupri vahe ovesa; peyapora pe querẽhisa pipe ité. Ahe niha Tūpa oipota, ndahei ambuae yande cuaisa pipe tẽi, ndahei avei guarepochi pota raisave yayapo. Yayapora rumo mboraviqui yande querẽhisa pipe ité. ³ Ndapeicoi chira pe remiaro upe inungar que mborerecuar güeco ivatesa pipe oporocuai pĩrata vahe. Pemboyecuar rumo pe recocuer aviye vahe chupe imbohesa tupri pipe. ⁴ Evocoyase acoi oyevisse yande Yar, yande rãrosar ivate catu vahe, ahese peipisira mbahe porerecosa, teco ori porañete apirẽhi vahe.

⁵ Iyavei no pe mbia chĩhivahe, pemboyeroyara ava pe rãrosar peico. Iyavei opacatu peyemboyeroyara pe reco mbegüesa pipe peyeupe peico. Esepia,

“Tūpa ava oyeecomboivate ai vahe amotarẽhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa pĩratasa povrĩve. Evocoiyase pe reco mboivatera curi.

⁷ Opacatu mbahe rese pe pihãñemoñeta atisa pemombehura Tūpa upe. Esepia, ahe pe rãrosar ité secõi.

⁸ Pearacua cañi rene peyesui, pemahemoha ari rupi peyese. Esepia, pe amotarẽhimbar Carugar pe reco momara pota yepi inungar yaguar oñaro vahe oguata tẽi oporoeca ‘tamomara ava’ oyapave. ⁹ Sese peyemoviracuara Tūpa rese pe yeroyasa pipe Carugar upe. Esepia, picua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tūpa teieté pe reco mohivi tuprira, iyavei pe reco moviracuara, pe momirata aveira pe yepipi iriẽhi ãgua ichui. Ahe niha oporovasasa pipe yande poravo oyeupe nara, yande yaso vahe rã supi teco ori ndopai vahesave yande Yar rese yande recosa pipe. ¹¹ Ëgüe tehi tasecoi güeco pĩratasa apirẽhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pĩtivĩisa pipe co ayapo imondo che rembicuachia ndipucuimi vahe pe mboaracua catu ãgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tūpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos,

che rahir nungar avei imahenduha pe rese.
14 Peyeovaupite “avirave” apo pe yeaisusa pipe.
Tapereco tecocuer tupri yande Yar Jesucristo
rese peico vahe. Aipo rupive.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

c27c2d97-c359-59f5-b367-83efb2e33739